

PERSIAE REGNUM

siue

SOPHORVM IMPERIUM.

Perfarum Imperium vti olim celebre, sic etiamnum hodie maximè clarum est, amplissimasque Regiones comprahendit: nam omnem eum Asiæ tractum, qui est inter Tigrim fluuium, Sinum Persicum, Mare Indicum (quod olim Rubrum) Indum, & Iaxartem (hodie Chésel) fluuium, & Caspium mare, nostra ætate à Sophis possidetur. De Sophorum origine, ex Ioannis Barrij Asiæ Decadib. hæc transtulit Cælius Curius, in sua historia Sarracénica, Anno Salutis nostræ .M. CCC. LXIX. Erat quidam Regulus inter Persas, Ardenelim oppidum obtinens, Sophi appellatus, qui se ex Alis Muamedis generi, stirpe, per Musam Cazinum eius nepotem oriundum gloriabatur. Hic Babilonio Calyfa extincto; & aduersa factione, quam Turcæ tuebantur, à Tartaris depressa, cœpit liberius suam de religione sententiam profiteri: & quia Hocemus Alis filius, à quo ipse se genus ducere iactabat, duodecim filios habuerat, volens aliquod sectæ suæ, quo à ceteris dignoscerentur, signum imponere, instituit, vt qui suam sectam amplecti vellent, tyaram sub velo, quo caput Turcæ omnes involuunt, (tulibantem appellant) purpuream gestarent, quæ in medio extra tulibantem duodecim fastigia emitteret. Eoque mortuo successit filius Guines appellatus; qui tantam sibi in toto Oriente doctrinæ sanctitatisque opinionem conciliauit, vt Tamerlanes ille clarissimus Parthorum Imperator, qui Bayazetem Turcarum Regem cepit, per Persidem iter faciens, eum quasi sanctum aliquem virum inuisere voluerit: ab eoque Guines triginta captiuorum, quos secum adducebat, millia dono impetrarit, quos ipse post in secta sua instituit; eorumque opera Secaidar eius filius in bellis vsus est: is enim Guine mortuo, Georgis Scythiæ populis, suis finitimis, sed Christianis, (horum viribus fretus,) bellum intulit, multisque illos cladibus afflixit, &c. Hæc de Sophorum origine dicta sint. Hi cum Turcis continua bella ob Mahumetanam Religionem gerunt; quoniam Sophiani vnum Mahumeticæ Religionis interpretem sequuntur, & Turcæ alterum; qui quidem interpretes inter se sunt dissentientes, adeo vt Sophiani hæretici sint nuncupati à Turcis, & Turci à Sophianis. Gens natura liberalis est, & ciuilitatis amans, litteras & artes colunt, nobilitatem agnoscunt: in eo à Turcis differunt, quod hi nullum sanguinis aut steinmatum discrimen norunt. Harum Regionum situm, gentisque viuendi morem & ritus, vide apud Aloysium Ioannis Venetum; Iosaphat Barbarum; Ambrosium Contarenum; Ioannem Mariam Angiolellum; & cuiusdam mercatoris anonymi, cum his impressam peregrinationem. Consule etiam Iesuitarum Epistolas; & Nicolai Geni Patricij Veneti Cōmentaria rerum Persicarum.